

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
**OPĆINSKI SUD U
TUZLI**
Broj: 32 0 St 478653 25 St
Tuzla, 23.04.2025.godine

Općinski sud u Tuzli, sudija Antonela Đaković, u postupku prethodnog ispitivanja prijedloga za otvaranje stečajnog postupka nad dužnikom nad dužnikom „BIANKO“ d.o.o za proizvodnju, promet i usluge Tuzla, ul. Brgule br. 11, koga zastupa punomoćnik Rizah Uljić, advokat iz Tuzle, dana 23.04.2025.godine donio je slijedeće:

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika **MBS: 1-13083, JIB: 4209667420009.**

Za privremenog stečajnog upravnika imenuje se Alma Topić iz Gračanice, ul. Riječka br.50, Gračanica.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju FBiH (Službene novine FBiH br. 53/21), a naročito:

- obezbijediti imovinu dužnika i starati se o istoj,
- ima ovlašćenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka
- uraditi kontrolu poslovanja stečajnog dužnika
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za geodetske i imovinsko-pravne poslove Grada Tuzla, radi upisa zabilježbe otvaranja prethodnog stečajnog postupka.

O b r a z l o ž e n j e

Predlagač „BIANKO“ d.o.o. Tuzla, putem zastupnika društva, podnio je ovom sudu dana 31.01.2025.godine prijedlog za otvaranje stečajnog postupka nad navedenim pravnim dužnikom, zbog platežne nesposobnosti dužnika, odnosno prestanka rada društva Odlukom osnivača, a račun društva je blokiran.

Na ročištu za saslušanje stečajnog dužnika zakonski zastupnik istog je izjavio da ostaje kod prijedloga za otvaranje stečajnog postupka, a kao razlog ističe platežnu nesposobnost i nemogućnost izvršavanja dospjelih i potraživanih obaveza plaćanja u dužem vremenskom periodu, te je društvo prestalo sa radom Odlukom osnivača društva broj: 1/24 od 28.01.2025.godine, kao i Rješenjem Općinskog suda u Tuzli broj: 032-0-Reg-17-000847 od 21.04.2017.godine. Osnovna djelatnost društva je bila proizvodnja ljepila. Račun društva otvoren kod Addiko Banke d.d Sarajevo na dan 10.12.2024.godine je blokiran neprekidno od 28.08.2017.godine. Društvo nema imovine. Društvo ima obaveze prema Poreznoj upravi FBiH u iznosu od 8.868,15 KM i prema Upravi za indirektno/neizravno oporezivanje BiH u iznosu od 2.680,00 KM. Društvo nema zaposlenika, nema aktivnih sudskih sporova.

U postupku ocjene osnovanosti prijedloga za pokretanje stečajnog postupka sud je utvrdio da je neophodno provesti prethodni postupak kako bi mogao odlučiti o osnovanosti prijedloga.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača i da je isti dopušten u smislu odredbe člana 58. stav 2. i 13. Zakona o stečaju postupku, dana 15.04.2025.godine rješenjem naložio predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka. Predlagač je dana 22.04.2025.godine dostavio dokaz o uplati iznosa od 3.000,00 KM na ime troškova finansiranja prethodnog stečajnog postupka. Imajući u vidu dostavljenu dokumentaciju i izjavu zakonskog zastupnika dužnika na ročištu za saslušanje, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, od dana objavljivanja rješenja u Službenim novinama F BiH. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu u Tuzli putem ovog Suda.